



Nunatsinni demokratiimik tamallu oqartussaaqataanerannik qanoq paasinnittaariaaseqarnerput pillugu apeqquteqaat aallaavigalugu oqallisissiasatut siunnersuut

(Inatsisartunut ilaasortaq Aqqalu C. Jerimiassen, Atassut)

Apeqquteqaat aallaavigalugu oqallisissiasatut siunnersuummut Inatsisartunut ilaasortamut Aqqalu C. Jeremiassen-imut qujanaq.

Demokratii tamallu oqartussaaqataanerat Demokraatinut isumaqarpoq Inatsisartunut qinersinermi ukiut sisamakkaarlugit krydsiliisarnermiit annertunerujussuusoq. Uagutsinnut pingaartuuvoq, demokratii aammalu inuinnaat naalakkersuisooqataaneranni tunngaviusut inuiaqatigiinnut tamanut sunniteqarnissaat. Tassungalun tunngatillugu isumaqarpunga, ajunngitsumik maani nunatsinni ingerlasugut.

Tamatta oqartussaaqataavugut, tusagassiuutit kiffaangissuseqarput, allaffissornikkut katersuunnikkullu kiffaangissuseqarpugut, taakkulu kiffaangissutsit atornerqarput. Inatsisartunut, Folketinngimut, kommunalbestyrelsinut nunaqarfinnullu aqutsisunut assigiimmik kiffaangissuseqartumillu qinerseriaaseqarpugut. Taakkulu saniatigut inuiaqatigiit sumiinneq apeqqutaatinnagu qinersisinnaatitaapput soorlu assersuutigalugu ineqartut peqatigiiffiinut, skolebestyrelsinut elevrådinullu. Taamaaliornikkut isumaqarpunga tamat oqartussaaqataanerat maani nunatsinni ingerlasoq ingerlalluarlunilu.

Pitsanngorsaaffigisassatut tikkuagaqassaguma, Naalakkersuisut ammanerunissaat kissaatigissavara. Maannakkut Naalakkersuisuusut tusagassiuutinik oqaloqateqarnissartik orniginanngilluinnartippasippaat isornartunillu aperineqarnissartik nuannarinngilluinnarlugu. Tamatta inuinnaat oqartussaaqataanerannut ajornartorsiutaasutut isigaara, Naalakkersuisullu kajumissaarusuppakka aqqeeqqullugit pitsaaneruleqqullugillu.

Siunnersuuteqartup oqallisissiatut allakkamini kiffaangissuseq akileraarutillu assut sammivai. Uani qulakkeerusuppara, qularutigineqassanngitsoq Demokraatit isumaat. Uagutsinnut inuttut kiffaangissuseq pingaaruteqartorujussuovoq. Sulivugut ataasiakkaat sapinngisamik kiffaangissuseqarnissaq anguniarlugu. Taassumalu kinguneraa aamma, innuttaasutut suliffeqarfittullu aningaasat isertissimasat amerlanersaasa tigummiinnarnissaat. Tamanna tunngavissaqarlunilu naapertuuppoq. Taamatut oqareernermi, aamma pingaaruteqarluinnarpoq, qulakkiissallutigu, tunngaviusumik atugarissaarnissamut pingaarnerpaanut aningaasassaqartuarnissarput soorlu assersuutigalugu utoqqalinersiutinut, peqqinnissaqarfik ingerlalluartoq, meeqqat atuarfiat pitsaasoq, ulluunnerani paaqqinnittarfiit pitsaasut allalu atugarissaarnissatsinnut pisinnaatitaaffitsitut isigisatsinnut.

Tassalu Demokraatit oqallinnermut isummersuutigigallagaat.



DEMOKRAATIT
DEMOKRATERNE